

05 AUG 1998

Bola sepak-Belia (Malaysia/China)

CHINA JUARAI KUMPULAN 7

Oleh: Mohd Kamel Othman

JOHOR BAHRU, 5 Ogos (Bernama) -- China yang merupakan pasukan favorit mempamerkan permainan bola sepak yang cantik bagi menumpaskan Malaysia 3-0 pada perlawanan pusingan kelayakan Bola Sepak Belia Asia Bawah 19 Kumpulan 7 di Stadium Larkin di sini malam ini.

China yang memenangi kesemua tiga perlawanan, menduduki tangga teratas Kumpulan 7. Mereka menempah tiket ke kejohanan Bola Sepak Belia Asia Bawah 19 di Chiangmai pada Oktober.

Pasukan Malaysia, yang belum teratur permainannya pada awal permainan, tidak berdaya langsung menyaingi kepantasan dan kelincahan pemain-pemain China. China memperolehi tiga sepakan sudut pada enam minit pertama dan satu daripadanya menghasilkan gol.

Sepakan sudut Chen Licheng pada minit ketiga disambar Li Yi yang melompat tinggi untuk menewaskan dua pemain pertahanan Malaysia sebelum menanduk kemas ke dalam jaring menewaskan Kamarulzaman Hassan.

Dari situ, pasukan Chinese sering menyerbu pintu gol Malaysia dengan serangan-serangan pantas yang mengkucar-kacirkan pertahanan Malaysia.

Pada minit ke-15, China mendahului dengan dua gol. Li Yan membuat hantaran lintang kepada Shen Han yang merembat masuk bola ke dalam jaring, yang meupakan gol keempatnya pada kejohanan ini.

Malaysia cuba menembusi pertahanan China beberapa kali tetapi ternyata kubu pertahanan mereka terlalu kebal dan dengan mudah menangkis segala serangan Malaysia.

Namun demikian Kamarulzaman terpaksa bertungkus-lumus bagi mengelakkan Chinese daripada menambah jaringan dengan menyelamatkan beberapa cubaan.

Malaysia bermain agak lebih baik pada separuh masa kedua tetapi masih mereka bukan tandingan pasukan China.

Li Yi sekali lagi dengan larian solo menjaringkan gol ketiga pada minit ke-66 dari jarak 30 meter melepasi S.Jayaprakash dan Mohd Nidzam Jamil. Inilah gol keduanya pada kejohanan ini.

Dalam usaha mengukuhkan pertahanan, Malaysia menggantikan S.Jayaprakash dengan Mohd Fairuz Mohd Noor tetapi ini juga tidak berjaya menyekat kemaraan pemain-pemain China.

MALAYSIA: Kamarulzaman Hassan, Faziallah Mamat (Mahathir Mohd Jamal), Mohd Nidzam Jamil, S.Jayaprakash (Mohd Fairuz Mohd Noor), R.Nantha Kumar, Rafiz Abu Bakar (Jaafar Salleh), Mohd Shawal Johari, Akmal Rizal Ahmad Rakhli, Hairuddin Omar, Mohamed Helmi Mohamed, Kamarulzaman Yub Abdul Majid.

CHINA: Liu Yunfei, Xu Yunlong (Wang Xiao), Zheng Zhi, Chen Licheng, Li Yi (Wang Jainyu), Liu Yujian, Zhao Junzhe, Li Yan, Shen Han (Liu Fei), Wang Liang, Lu Bofei.

-- BERNAMA

MKO ZAB